

食貨典第四十六卷

田制部彙考六

宋三

紹興二十一年學田爲勢家侵佃者命提學官覺察 按宋史高宗本紀不載 按食貨志二十一年以大理寺主簿丁仲京言凡學田爲勢家侵佃者命提學官覺察又命撥僧寺常住絕產以贖學戶部議併撥無勅額庵院田詔可

紹興二十三年秋七月庚戌禁諸軍瀕太湖擅作壩田冬十月丁丑修築宣州太平州圩田 按宋史高宗本紀云云 按食貨志二十三年諫議大夫史才言浙西民田最廣而平時無甚害者太湖之利也近年瀕湖之地多爲兵卒侵據累土增高長堤彌望名曰壩田旱則據之以漑而民田不沾其利澇則遠近泛濫不得入湖而民田盡沒望盡復太湖舊迹使軍民各安田疇均利從之

紹興二十四年大理寺丞周環請決白茅浦故道以洩臨安平江湖秀四州下田積水詔兩浙漕臣視之 按宋史高宗本紀不載 按食貨志二十四年大理寺丞周環言臨安平江湖秀四州下田

多爲積水所浸緣溪山諸水併歸太湖自太湖分二派東南一派由松江入於海東北一派由諸浦注之江其松江泄水惟白茅一浦最大今泥沙淤塞宜決浦故道俾水勢分派流暢實四州無窮之利詔兩浙漕臣視之

紹興二十六年詔佃淮南京西閒田及占射官田罷鬻戶絕田命離軍添差人各授以江淮湖南荒田以轉運判官王之望提點刑獄畢經界事又詔拘賣所在常平沒官戶絕田 按宋史高宗本紀二十六年三月己巳募四川民佃淮南京西閒田並邊復租稅十年次邊五年夏四月戊戌詔淮南京西占射官田踰二年未盡墾者募人更佃六月辛未朔罷諸路鬻戶絕田閏十月己酉命離軍人願歸農者人給江淮湖廣荒田百畝復其租稅 按食貨志二十六年正月上謂輔臣曰經界事李椿年主之若推行就緒不爲不善今諸路往往中輟願得一通曉經界者款曲議之會潼川府轉運判官王之望上書言蜀中經界利害甚悉明年以之望提點刑獄畢經界事三月戶部言蜀地狹人夥而京西淮南膏腴官田尙多許人承佃官貸牛種八年仍償並邊免租十年次邊半之滿三年與其業願往者給據津發上曰善但貧民乞請荒田安能便得牛種若不從官貸未免爲虛文可令相

度支給四月通判安豐軍王時升言淮南土皆膏腴然地未盡闢民不加多者緣豪強虛占良田而無徧耕之力流民襁負而至而無開耕之地望凡荒閒田許人剋佃戶部議期以二年未墾者卽如所請京西路如之詔以時升爲司農寺丞十月用御史中丞湯鵬舉言離軍添差之人授以江淮湖南荒田人一頃爲世業所在郡以一歲奉充牛種費仍免租稅十年丁役二十年 又按志二十六年以諸路賣官田錢七分上供三分充常平司糴本初盡鬻官田議者恐佃人失業未賣者失租侍御史葉義問言今盡鬻其田立爲正稅田旣歸民稅又歸官不獨絕欺隱之弊又可均力役之法浙東刑獄使者邵大受亦乞承買官田者免物力三年至十年一千貫以下免三年一千貫以上五年五千貫以上十年於是詔所在常平沒官戶絕田已佃未佃已添租未添租並拘賣

紹興二十七年詔拘勢家所占田措置蠲其冒佃之租 按宋史高宗本紀不載 按食貨志二十七年趙子瀟奉詔措置鎮江府沙田欲輕立租課令見佃者就耕如勢家占吝追日前所收租利詔速拘其田措置蠲其冒佃之租

紹興二十八年遣莫濛等檢視諸路沙田蘆場以孫蘊措置沙田減裂罷之增沙田蘆場官民戶租

以平江民田淹沒開濬常熟五浦通江又王之望言經界事迄此後吏民扇搖百姓者乞置重法從之按宋史高宗本紀二十八年春正月癸未遣戶部郎中莫濛等檢視淮南浙西江東沙田蘆場按食貨志二十八年正月詔戶部員外郎莫濛同浙西江東淮南漕臣趙子滿鄧根孫盡視諸路沙田蘆場先是言者謂江淮間沙田蘆場爲人冒占歲失官課至多故以命濛等既而殿中侍御史葉義問言奉行者不恤百姓名爲經量實逼縣官按圖約紐惟務增數以希進用有力之家初無加損貧民下戶已受其害因小利擾之必致逃移坐失稅額因極論之二月詔沙田蘆場止爲勢家詭名冒占其三等以下戶勿例根括六月以孫盡措置沙田滅裂罷之詔浙西江東沙田蘆場官戶十頃民戶二十頃以上並增租餘如舊置提領官田所掌之不隸戶部又按志二十八年兩浙轉運副使趙子滿知平江府蔣璨言太湖者數州之巨浸而獨洩以松江之一川宜其勢有所不逮是以昔人於常熟之北開二十四浦疏而導之江又於崑山之東開一十二浦分而納之海三十六浦後爲潮汐沙積而開江之卒亦廢於是民田有淹沒之患天聖間漕臣張綸嘗於常熟崑山各開衆浦景祐間郡守范仲淹亦親至海浦濬開五河政和間提舉官趙霖復嘗開濬今諸浦湮塞又非前比

計用工三百三十餘萬錢三十三萬餘緡米十萬餘斛於是詔監察御史任古復視之既而古至平江言常熟五浦通江誠便若依所請以五千功月餘可畢詔以激賞庫錢平江府上供米如數給之又按志二十八年王之望言去年分遣官詣經界不均縣裁正今已迄事此後吏民尙敢扇搖以疑百姓者乞重寘於法從之

紹興二十九年限命官子孫制田格詔鬻官田禁抑買者令諸路提舉常平官覺察賣多者增秩稽遲者貶承買者免物力計年久近有差又以莫濠經量沙田蘆場失實責之按宋史高宗本紀二十九年三月丁丑限命官子孫制田減父祖之半併其詭名寄產者格秋七月己酉禁諸路抑買官田按食貨志二十九年初兩浙轉運司官莊田四萬二千餘畝歲收稻麥等四萬八千餘斛營田九十二萬六千餘畝歲收稻麥雜豆等十六萬七千餘斛充行在馬料及糴錢四月詔令出賣七月詔諸路提舉常平官督察欺弊申嚴賞罰分水令張升佐宜興令陳迥以賣田稽違各貶秩罷任九月浙東提舉常平都絜以賣田最多增一秩又按志二十九年以莫濠經量沙田蘆場失實責監饒州景德鎮稅遂詔盡罷所增租按文獻通考二十九年戶部提領官田所言應官戶勢家坐

占官田今依估承買其浙西營田及餘路營田官莊田屯田並住賣詔各路提舉司督察欺弊申嚴賞罰縣賣十萬緡州二十萬緡守令各進一秩餘以次減磨勘最稽遲者貶秩 荆南提刑彭合入

對言州縣賣官田之害望減價無抑勒戶部以減價爲難但令勿抑勒而已 諫議大夫何溥言比

議臣欲優恤見佃者令減價二分承買而復謂其低價買增價賣或借錢收買增價准折許人告卽拘沒夫始憐其失業而爲之減價終設爲轉賣之說而開其爭端望明詔改正 兩浙轉運司言申

括到平江府省田一十六萬六千七百二十八畝每畝納上供省苗三斗二升六合計米三萬九千四十七石係民戶世業今若出賣便爲私田上輸二稅暗失上供歲額苗米乃止 臣僚言江東西

二廣村疇之間人戶凋疎彌望皆黃茅白葦民間膏腴之田耕布猶且不徧豈有餘力可置官產浙東西最號繁盛所買僅及百餘萬緡累月尙未足數且有抑勒之患況江廣米穀旣平錢貨艱得畝

直不過貫百縱根括無遺其能應期限乎若謂命令已行難於請罷乞寬之一年聽民情願無或抑勒違者坐之詔可 又言二年之間三省戶部困於文移監司州郡疲於出賣上下督責始限一季

繼限一年已賣者纔十三已納者纔十二其事猶未竟也蓋買產之家無非大姓估價之初以上色

之產輕立價買揭榜之後率先投狀至於拆封往往必得今之已賣者是也若中下之產無人計囑所立之價輕重不均今之無人承買者是也宜且令元佃之家著業納租歲猶可得數十萬斛從之紹興三十年詔承買荒田者免三年租 按宋史高宗本紀不載 按食貨志云云

紹興三十二年命經畫兩淮堡砦屯田募民耕淮東荒田又命止沙田勿行汪澈奏開襄陽二渠溉田 按宋史高宗本紀三十二年三月辛亥命兵部侍郎陳俊卿工部侍郎許尹經畫兩淮堡砦屯田夏四月甲戌募民耕淮東荒田 按食貨志三十二年十有一月方滋疏論沙田上問沙田或以爲可取或以爲可捐陳康伯等奏君子小人各從其類小人樂於生事不惜爲國斂怨君子務存大體惟恐有傷仁政所以不同上然之命止前詔勿行 又按志三十二年督視湖北京西軍馬汪澈言荆湖兩軍屯守襄漢糧餉浩瀚襄陽古有二渠長渠溉田七千頃木渠溉田三千頃兵後堙廢今先築堰開渠募邊民或兵之老弱耕之其耕牛耒耜種糧令湖北京西轉運司措置旣省餽運又可安集流亡從之

孝宗隆興元年督諸路開營田詔百姓逃棄田宅三十年依戶絕法臣僚言營田十說陳之茂建掘

園田議又以張闡言令虞允文同王珪措置荆襄屯田 按宋史孝宗本紀隆興元年五月丁未督

諸路開營田 按食貨志隆興元年詔凡百姓逃棄田宅出三十年無人歸認者依戶絕法 又按

志隆興元年臣僚言州縣營田之實其說有十曰擇官必審募人必廣穿渠必深鄉亭必修器用必
備田處必利食用必充耕具必足定稅必輕賞罰必行且欲立賞格以募人及住廣西馬綱三年以
市牛會有訴襄陽屯田之擾者上欲罷之工部尙書張闡言今日荆襄屯田之害以其無耕田之民
而課之游民游民不足而強之百姓於是百姓舍己熟田而耕官生田或遠數百里微呼以來或名
雙丁而役其強壯老稚無養一方騷然罷之誠是也然自去歲以來置耕牛農器修長木二渠費已
十餘萬一旦舉而棄之則荆襄之地終不可耕也比見兩淮歸正之民動以萬計官不能續食則老
弱饑死强者轉而之他若使之就耕荆襄之田非惟可免流離抑使中原之民間之知朝廷有以處
我率皆襁負而至矣異時墾闢既廣取其餘以輸官實爲兩便詔除見耕者依舊餘令虞允文同王
珪措置 按文獻通考隆興元年詔應人戶拋下田屋如有歸者依舊主業已請佃者卽時推還
出二十年無人歸認依戶絕法 又詔貧乏下戶或因賦稅或因饑饉逃亡官司卽時籍其田土致

令不復歸業今州縣申嚴赦文五年之限應歸業者卽給還

按玉海隆興元年五月十七日丁

未臣僚言營田十說一曰擇官必審魏武用任峻司馬懿用鄧艾是也二曰募人必廣趙充國留萬二百八十一人李彪請取戶十分之一是也三曰穿渠必深充國浚漕渠鄧艾開河渠是也四曰鄉亭必修充國繕鄉亭是也五曰器用必備充國上器用簿是也六曰田處必利漢屯張掖魏屯許昌是也七曰食用必充充國屯田用穀月二萬七千餘斛是也八曰耕具必足李彪請以雜物市牛唐開元二十五年一頃五十畝配一牛是也九曰定稅必輕晉應詹上表一年與百姓二年分稅李彪上表一夫之田歲責六十斛蠲其雜役是也十曰賞罰必行晉元帝督課長吏以穀多少爲殿最齊武成河清中詔營屯田歲終課所入以論褒貶是也凡此十者營田之制盡矣 又按玉海隆興初陳之茂建掘園田之議

隆興二年劉寶具到見管營田官莊田頃畝數詔江東浙西措置園田又令廢鑑湖低田以不披帶人縱耕官荒田 按宋史孝宗本紀二年八月戊午命江東浙西守臣措置開決園田九月甲午詔江東浙西監司守臣講明措置田事 按食貨志二年八月詔江浙水利久不講修勢家園田堙塞

流水諸州守臣按視以聞於是知湖州鄭作肅知宣州許尹知秀州姚憲知常州劉唐稽並乞開圍田濬港瀆詔湖州委朱夏卿秀州委曾惛平江府委陳彌作常州江陰軍委葉謙享宣州太平州委沈樞措置九月刑部侍郎吳芾言昨守紹興常請開鑑湖廢田二百七十頃復湖之舊水無泛濫民田九千餘頃悉獲倍收今尚有低田二萬餘畝本亦湖也百姓交佃畝值纔兩三緡欲官給其半盡廢其田去其租戶部請符浙東常平司同紹興府守臣審細標遷從之又按志二年江淮都督府參贊陳俊卿言欲以不披帶人擇官荒田標旗立砦多買牛犁縱耕其中官不收租人自樂從數年之後墾田必多穀必賤所在有屯則村落無盜賊之憂軍食既足則饋餉無轉運之勞此誠經久守淮之策詔從之按玉海二年正月劉寶具到見管營田官莊四十二所田四百七十五頃八十五畝官兵五百五人客戶二百六十五戶先是詔令寶條具兩淮屯田

乾道元年命諸臣條具措置屯田又戶部上浙西營田官莊頃畝數按宋史孝宗本紀乾道元年三月庚申命淮西湖北荆襄帥臣措置屯田五月癸亥詔總領帥漕臣諸軍都統制並兼提領措置屯田沿邊守臣兼管屯田事十一月辛未遣龍大淵撫諭兩淮措置屯田按玉海乾道元年二

月二十四日詔郭振於六合措置屯田已就緒淮南東路屯田令郭振王弗周淙條具措置王弗等言紹興六年十二月二十九日指揮以五十頃爲一屯作一莊三月十一日詔淮西湖北荆襄令沈介張松王炎楊傑王彥趙擢等措置三月三日戶部言浙西營田官莊共一百五十九萬餘畝

乾道二年以戍兵田給還復業民罷盱眙屯田詔開浙西園田賣江西營田又罷權借職田禁修築園田廢永豐圩按宋史孝宗本紀二年春正月辛酉省六合戍兵以所墾田給還復業之民二月丁丑罷盱眙屯田夏四月庚辰詔兩浙漕臣王炎開平江湖秀園田五月己酉罷權借職田癸丑禁浙西修築園田六月丙戌廢永豐圩按食貨志二年四月詔漕臣王炎開浙西勢家新園田草蕩荷蕩菱蕩及陂湖溪港岸際旋築塍畦園裏耕種者所至守令同共措置炎既開諸園田凡租戶貸主家種糧債負並奏蠲之六月知秀州孫大雅代還言州有柘湖澱山湖當湖陳湖支港相貫西北可入於江東南可達於海旁海農家作壩以却鹹潮雖利及一方而水患實害鄰郡設疏導之則又害及旁海之田若於諸港浦置牐啟閉不惟可以洩水而旱亦獲利然工力稍大欲率大姓出錢下戶出力於農隙修治之於是以兩浙轉運副使姜誥與守臣視之誥尋與秀常州平江府江陰軍條

上利便詔秀州華亭縣張涇牐并澱山東北通陂塘港淺處俟今年十二月興修江陰軍常州蔡涇牐及申港明年春興修利港俟休役一年興修平江府姑緩之 又按志二年戶部侍郎曾懷言江西路營田四千餘頃已佃一千九百餘頃租錢五萬五百餘貫若出賣可得六萬七千餘貫及兩浙轉運司所括已佃九十餘萬畝合而言之爲數浩瀚今欲遵元詔見佃願買者減價二分詔曾懷等提領出賣其錢輪左藏南庫別貯之 按續文獻通考二年修白葉湖溉田種千石 按玉海

二年六月十三日淮西言營田二百七頃六十五畝

乾道三年姜詵使還奏開濬畢功久浸民田露出塍岸罷淮西江東營田 按宋史孝宗本紀三年六月戊寅罷淮西江東總領所營田募人耕佃 按食貨志三年三月詵使還奏開濬畢功通洩積水久浸民田露出塍岸臣已諭民趁時耕種恐下戶闕本良田復荒望令浙西常平司貸給種糧又奏措置提督監修等官知江陰軍徐藏等減磨勘年有差

乾道四年詔江東路營田令見佃者承買限品官子孫名田募民耕佃關外四州營田遣知無爲軍徐子寅措置楚州官田以彭州守梁介修復諸陂溉田 按宋史孝宗本紀四年九月庚午限品官

子孫名田是秋罷關外四州營田官兵募民耕佃十一月壬戌遣知無爲軍徐子寅措置楚州官田招集歸正忠義人以耕按食貨志四年四月江東路營田亦令見佃者減價承買期以三月賣絕八月住賣諸路未賣營田轉運司收租又按志四年以彭州守臣梁介修復三縣一十餘堰灌漑之利及於鄰邦詔介直祕閣利路轉運判官

乾道五年措置兩淮屯田募民耕佃科州營田及淮東屯田招集歸正忠義人耕墾官田詔江東路有圩田不復賣又等第成都路歲收米均數召佃按宋史孝宗本紀五年春正月甲戌措置兩淮

屯田三月癸未罷科州路諸州營田官兵募民耕佃九月己未罷淮東屯田官兵募民耕佃壬申命淮西安撫司參議官許子中措置淮西山水砦招集歸正忠義人耕墾官田按食貨志五年三月

四川宣撫使鄭剛中撥軍耕種以歲收租米對減成都路對糴米一十二萬石贍軍然兵民雜處村疇爲擾百端又數百里外差民保甲教耕有二三年不代者民甚苦之知興元府晁公武欲以三年所收最高一年爲額等第均數召佃放兵及保甲以護邊從之八月詔鎮江都統司及武鋒軍三處屯田兵並拘收入隊教閱按玉海五年正月徐子寅爲大理正措置兩淮屯田官又按玉海

五年九月十四日詔江東路有常平轉運司圩田建康寧國太平池州共七十九萬餘畝不復賣歲輸租太軍倉 建康永豐圩紹興二年田二百九十七頃

乾道六年以梁俊彥所括沙田蘆場行在置司措置監進奏院李結獻治田三議詔罷和揚州屯田按宋史孝宗本紀六年秋七月癸未詔以沙田蘆場歲收租稅六十餘萬緡入左藏南庫 按食貨志乾道元年臣僚言浙西淮東江東路沙田蘆場頃畝浩瀚宜立租稅補助軍食詔復令梁俊彥與張津等措置二年輔臣奏俊彥所上沙田蘆場之稅或十取其一或取其二或取其三皆不分主客朝廷疑之六年以俊彥所括沙田蘆場八百二十餘萬畝其間或已充己業起稅不一及包占未起租者乞並估賣立租詔蔡光梁俊彥行在置司措置 又按志六年十有二月監進奏院李結獻治田三議一曰務本二曰協力三曰因時大略謂浙西低田恃堤爲固若堤岸高厚則水不能入乞於蘇湖常秀諸州水田塘浦要處官以錢米貸田主乘此農隙作堰增令高闊則堤成而水不爲患方此饑饉俾食其力因其所利而利之秋冬旱涸涇浜斷流車畎修築尤爲省力詔令胡堅常相度以聞其後戶部以三議切當但工力浩瀚欲曉有田之家各依鄉原畝步出錢米與租田之人更相修

築庶官無所費民不告勞從之 又按志六年罷和揚州屯田

乾道七年王炎言知興元府吳拱修復山河堰溉田二十三萬餘畝詔獎諭拱李結梁克家奏以營田撥歸常平置官莊 按宋史孝宗本紀不載 按食貨志七年王炎言興元府山河堰世傳漢蕭曹所作本朝嘉祐中提舉史照上堰法獲降敕書刻石堰上紹興以來戶口凋疎堰事荒廢遂委知興元府吳拱修復發卒萬人助役宣撫司及安撫都統司共用錢三萬一千餘緡盡修六堰濬大小渠六十五里凡溉南鄭褒城田二十三萬三千畝有奇詔獎諭拱 又按志七年提舉浙西常平李結乞以見管營田撥歸本司同常平田立官莊梁克家亦奏戶部賣營田率爲有力者下價取之稅入甚微不如置官莊歲可得五十萬斛

乾道八年措置官田追正沙田蘆場罷借職田鬻諸路官田復四川教授田又授田歸正人以薛季宣立官莊於黃岡麻城戶部侍郎葉衡言奉詔覈實寧國府太平州圩岸有利民田詔獎諭魏王愷復罷廬州兵屯田 按宋史孝宗本紀八年夏四月甲子措置兩淮官田徐子寅等坐授田歸正人逃亡奪官有差冬十月丙辰罷借諸路職田十一月辛未遣官覈江浙福建二廣湖南八路官田辛

已復四川諸州教授田十二月甲辰詔京西招集歸正人授田如兩淮 按食貨志八年十月遣官實江淮沙田蘆場頃畝悉追正之 又按志八年以大理寺主簿薛季宣於黃岡麻城立官莊二十二所 又按志八年戶部侍郎兼樞密都承旨葉衡言奉詔覈實寧國府太平州圩岸內寧國府惠民化城舊圩四十餘里新築九里餘太平州黃池鎮福定圩周四十餘里庭福等五十四圩周一百五十餘里包圍諸圩在內蕪湖縣圩周二百九十餘里通當塗圩共四百八十餘里並高廣堅緻瀕水一岸種植榆柳足捍風濤詢之農民實爲永利於是詔獎諭判寧國府魏王愷略曰大江之壩其地廣袤使水之蓄洩不病而皆爲膏腴者圩之爲利也然水土鬬蓄從昔善壞卿聿修稼政巨防屹然有懷勤止深用歎嘉 又按志八年復罷廬州兵屯田

乾道九年遣官賣營田官田以臣僚言江西荒旱不能預興水利灌田敕監司守令相視 按宋史孝宗本紀九年春正月戊寅遣官鬻兩浙營田及沒官田次及江東西四川如之 按食貨志九年以司農寺丞葉翥等出賣浙東西路諸官田以登聞檢院張孝賁等出賣江東西路諸官田以郎官薛元鼎拘摧江浙閩廣賣官田錢四百餘萬緡 又按志九年八月臣僚言江西連年荒旱不能預